

TULEO □-DOUR

Barzhonegoù

1. Antony HEULIN

Antony Heulin
Moritzburger Stra □ e 37 – 01127 Dresden – Deutschland
00 49 351 47 98 537
antonyheulin@hotmail.fr

*Não sou nada.
Nunca serei nada.
Não posso querer ser nada.
A parte disso, tenho em mim todos os sonhos do mundo*

Tabacaria Fernando Pessoa

*Je n'attends pas la fin du monde
Je prends juste mon temps pour tout comprendre*

Tout comprendre Didier Wampas

aet on d'ar porzh d'ar selin
èl ma vehe ar wezh diwezhañ
aet on a-hed murioù hir ar friturioù
betak dour a-vern glas-du ar mor
en ur soñjal ne vin ket a neblec'h da viken

ur ponner a gargo a oa éc'h eoriañ
dalc'het e-tal an douar get un nebeut kordennoù-skorj munud

n'on ket bet evit mont moraer
neuze on daet da vout ur lestr

àr dourioù ar lenn-vor e kouezhe goulioù ar c'hastell
éc'h 'n em dreuzfeurmiñ e morganed pa ne skeude netra an douar

poan-mor am bez
met neuial a-barzh ar mor-bras a vourran
klouar pe sklaset ne verna din
tra ma choma ma c'horf gronnet getoñ

àrc'hoarzh e vo dastumet ar c'hordennoù-skorj get ar lomaned
un nebeut re a spinay an dour
a bignay en-dro leizh ha gleb
a sec'hay er-maez

pa vez skuizh an dour get e redadeg trema ar mor e pella a-zoc'h ar stêr. ha pep hini ha mont d'e du distok e-mod kamaraded kleiz a-viskoazh. an dour skuizh-divi a zibaba matelasenn navet ur blaenenn a zo krouiset he c'hein. a-barzh enni e tiskuizhay en ur vervel. ar stêr a ya get e hent hep ehan, ar c'hozh dour a ya àr ampoesoniñ difonn. nag an neñv nag ar glav n'hellont louzouiñ anezhañ. tevet eo ar lenn yaouank a zo joaius get e gof bouilhenn, get empennoù troc'het e daou a zo hir o gwrizioù bouetaet get lec'hid ha fank. buan e taont er bed eno hag e kuzhont amprevaned ha breinadurioù. get ar mareoù hag ar chreskoù-dour e vez degaset dour fol, pesked, evned, damskeudoù buhez. froudoù didalvez àr lein an dour a vez mouget get o mammoù gwarm.

gwezhadoù eo dilorc'h ar c'hozh dour, bihanoc'h eo ar vatelasenn. àr vervel e ya poullennigoù-mor ha ne veva biskoazh àr-lerc'h ar bannoù-heol kentañ.

ur gran jibl foeñvet get aer
àr lein an dour
àr ur mor-bras gouez
é vale ag un aod d'egile
ha n'eus ket hini erbet mat evitañ

gwezhadoù, skorngréc'henoù gevell a zriva a-gevret. é heuliañ ar froudoù, é vont an eil get eben, éc'h 'n em ziankeniñ. é teuziñ hag é vont diàr wel.

e norzh pellañ ar bed
ur peñsead àr ur skorngréc'henn
é tec'hel a-zoc'h an douar skornet
é triviñ èl un douar-bras nevez

e-talte
ur peñsead arall àr ur skorngréc'henn arall
disfiañs zo get an den a gouska fall
a ziskreda a zinerva

ar peñsead a sava ur gledourenn
get plankenoù kollet àr ar mor
hag ur sklotur a sava-eñ
get ar c'hoad dilezet

àr vord ar skorngréc'henn ec'h azeza
e voued pemdeziek e pesketa
a-benn evañ e lipa e zouar
hag er goudor a-barzh e di koad e kouska

doc'h e amezeg e sella pizh
hag e choma àr-evezh
àrdreñv d'e sklotur koat
ha ne gleva ket an tommder

tamm ha tamm e teuz a ar skorngréc'henn
met n'eus netra d'ober
chom a ra é c'hedal
àrdreñv d'e sklotur koat

tamm ha tamm eo teuzet ar skorngréc'henn
ha beuzet eo ar peñsead
e-mesk darnoù a-strev
e sklotur koat

e norzh pellañ ar bed
ur peñsead àr ur skorngréc'henn
é tec'hel a-zoc'h an douar skornet
é triviñ èl un douar-bras nevez

e-talte
ur peñsead arall àr ur skorngréc'henn arall
ne verna d'an den a choma disoursi
a zegasa da gousket

ar peñsead a sava ur gledourenn
get plankennoù kollet àr ar mor
hag ur vagig a sava-eñ
get ar c'hoad dilezet

àr vord ar skorngréc'henn ec'h azeza
e voued pemdeziek e pesketa
a-benn evañ e lipa e zouar
hag er goudor a-barzh e di koad e kouska

plijadur en deus é sellet doc'h an deizioù àr hirraat
hag a-zoc'h an tommder zo daet gete
e tenna vad é reiñ liv an arem d'e gorf
hag é pellaat e valeadennoù

tamm ha tamm e teuza ar skorngréc'henn
ar peñsead a sava e bakadoù
a laka dour da deuziñ en ur bidon
a laka boued en e vag koat

tamm ha tamm eo teuzet ar skorngréc'henn
hag ar peñsead zo aet àr ar mor
trema un douar-bras arall
àr e vagig koat

a-barzh ur mor a dud
e kêr pe er parkoù
diaes
da dapout ur bobelan
yaouank tout bev tout é nijal tout...
e toull an dorn
diaes
d'e sañtiñ
é flourañ palv ho torn ha diaz ho pizied
é flourañ ac'hanoc'h en ur vervel a-bezh...
aet kozh en araok
abalamour d'un dorn kousiet
pigmantouù nijet kuit
hag ur c'horf-marv hep liv erbet

dibaot
pa zimeza ar bobelan get an dorn
pa zimeza an dorn get ar bobelan
un tamm sked a achapa d'an eured
diabaot
pa ne varva nag an eil nag egile

ur goumoulenn hir
un dev a vuzhugenn rozennoù skorn

kreunet àr an douar
kouezhet àr ar leur priek pe hu

kuzhet get an heol
ral a wezh en e uhelañ
kuzhet stank get
an heol

er c'hreisteiz ar c'horfoù
zo stok-a-stok a ziwiska
zo stok ha distok
flouradenn an heol doc'h an
orolaj-heol

diviget eo get an heol
diviget eo get an avel
distanet eo get an disheol
gwalc'het ha masklet eo get ar glav

orolaj bihan é sevel aes
faos e nerzhder
àr-c'horre e friantiz
get e lusk bihan digoll/frealzus
get e standur
a vounta-divounta ar gwall amzer

a zo ar chifroù roman harzoù e c'houiziegezh
resitet en un doare mekanikel
paour ag un eur d'eben

èl ar spesadoù arall, ar chardroñned o deus ur bugaleaj. sonn ha yen e vez.
er-maez ag ar sañtimentoù en em zigora ar chardroñned

é sevel a-barzh maez pe a-barzh un taol blot
n'eo deus ket ar chardroñned kalz tro da zont un dra arall

ur bed a chardroñned bodet amañ hag ahont/pep lec'h
a-barzh taolioù saloñs
ur bed a chardroñned

ruz pe velen int
skedus pe skedusoc'h e vez o livioù
pe ziflammoc'h dislivoc'h melisoc'h
lod anezhe a c'hwezha o jave, lod arall a zo balegek o darz

n'eo ket ken niverus ar chardroñned gwir. met ar goumoulenn tud-lez o meula
hag o c'huzha meur a wezh a-ratozh-kaer zo divent

heñvel razh int an eil doc'h egile neoazh anavet e ouiont hep poan erbet an eil doc'h egile
kasoni o deus an re doc'h egile
met ret eo dezhe en em unañniñ evit lazhañ

an dregasourion a bellont a stourmont doc'het a foeñvont etreze, a ziboanont, en em
zougont da grediñ int mistri ar bed en dro deomp e troont gourdrouzus, flemmus
gwezhadoù, é klask arrolliñ ac'hanomp, arvariñ hor brud, suniñ hor gwad. ne vern peseurt
oad e vezer e c'heller dont ur chardroñnenn

hentennoù emgann ha stourm doc'h ar chardroñned

bout e c'heller tagañ doc'h an neizhioù, doc'h un neizh
bout e c'heller kas ur stourm doc'hte get meur a zoare

pa vez izel a-walc'h live an neizh e c'heller en em deurel da reiñ un taol treid divicher
dezhañ. brav, kalonek eo ar feson d'ober, leun a ziemskiant a zo enni avat. digenvent eo
an degouezh doc'h ar nerzh fondet

1 tagadenn tal. un taol treid pe vazh doc'h an neizh ha diarvar e vez ar marv

1 tagadenn get ur goñbi (unan tud a-vicher). trubuilhet/dirollet e vez un tamm ar
lod a-zoc'h nerzh an taol, met re vuan e ta endro pep tra □ reizh □. dibaot e vez
pa vez unan anezhe éc'h añduriñ zoken. n'eus nemet ar gasoni doc'h a
argadour a greska. ne vez hejet nemet an ti get ar penn-bazh

1 kejet e vez gete, é tont èlte. risklet e vez en em goll ha dont da vout ur chardroñnenn.

neoazh, loenedigoù noazus e vez ar chardroñned. un nebeut tud a ziankena, a lâra groñs e vez talvoudus pep tra krouet get an natur. koulskoude, loenedigoù noazus e vez ar chardroñned, didalvoud, a zo é treuzveviñ a-drugarez d'ur henvojenn zroch. nemet ha 'vehe talvoudus enkorfañ ar gasoni hag an dispriz àr an douar ?

an dour evit o beuziñ, adsevel a reont pelloc'h
strimpet oc'h get an dour ha mard eo ar gouiañv eo sklaset don ho korf

an eoul skarzh, ho kousia ho saotra, a lazha un tamm ag hoc'h ene a achapa get un nebeut ag o re

neoazh, loenedigoù e vez ar chardroñned ne welont ket pelloc'h evit penn o darz, dallet get o livioù

anal an hini arall en noz
èl ur milouer a denna e anal

hag an hini arall kousket fall a evezh doc'h ar c'houk
a bep eil
ha ne greda ket fichal
ne faot ket chifal anal an hini arall

ne vez ket roet biskoazh ur skeudenn eilpennet get ar milouer
nemet ur skeudenn disheñvel e pep tu
heñvel

pe get
doc'h (h)e-unan

jestr e-unan an hini dihunet
al liñsel adlakaet àr ar c'horf é krenañ

anal an hini arall en noz
èl
ur milouer a denna e anal

barkoù e koat blot a ranka deskiñ neuial
choaz
chomel e koat blot
pe
dont da vout
ur vag houarn
ur vag plastik
pe
ur vag vrezel

evnigoù tremeniad da biv
e vez diskouezet ar stur
en ur
zianavet anezhañ hon-unan

gwezennigoù bresk a ranka deskiñ
kreskiñ
kaout drouk
hep en em derriñ na plegañ re na bout reut

korz a zo o fenn àr-c'horre an dour
a c'hella bout skrapet get ar mare

huennigoù landreüs
a greunenna en daoulagad
a nega
a stanka
hag
a achapa pand eo izel da vat ho kweled

huchadennoù é vont kuit
ken start eo evit hon diskouarn o c'hlevet mont da bell pa guita endro ar mare
é laoskel an aod-jibl en noazh

gwir eo n'ouian ket mat a-zoc'h ar plantennoù a vez ret bout दौरaet reizh-mat marteze get dour-mantal zoken dreist-holl pand int hurrenek hag e vourront darvoudoù boaz neoazh nag ur vrav a blantenn e oa-hi ur blantenn livet get razh a livioù ar vuhez n'em eus ket gwelet ar mouch diflamm ha disglav en deus goloet anezhi tamm ha tamm daoust d'am flourennoù d'hon istor karantez a gonten dezhi e yae-hi àr sec'hiñ diehan kouezhet eo he delioù hag o dibenn a oa lazhet rak ar yenijenn rak an diouer a zour glav दौरaet em eus anezhi ne vern peseurt-mod hag aet on skuizh èl ma ya skuizh ar vibien-den get pep tra hag e toureen anezhi kement ha kement ha hi da vont àr sec'hiñ diehan lakaet em eus ur balzam doc'hti aezhennet em eus frond c'hwek àrni sonet em eus a-veg sonet em eus get ar gitar eviti a-raok troiñ é yudal doc'hti ar plantennoù ne vourront ket ar lusk an dilojamantoù ar c'hemmoù hag ar redoù-avel ar beajoù pep tra a ficha muioc'h evit ur broñs é kreskiñ a-benn ar fin e yeomp-ni skuizh peogwir ne faota ket mui deomp dizoleiñ an delioù foeñvet ar re zo kouezhet diar ar pod hag a za da vout kanvasoù sizailhet a-raok kouezhel en hu hag un dra washoc'h a zo evit distreiñ en ti en ur gilaat ha kavout gwelloc'h ar ruioù daoust d'o rustoni d'o dantadennoù a-benn ar fin e yeomp da vale pell a-zoc'hti ken stank ma taomp da zisoñjal distreiñ da noz da vat ne sellomp ket mui doc'h restachoù jol àr pennoù an deliennnoù rousaet en em gavomp é vale ken pell a-zoc'hti ma choma-hi en hor lerc'h en ur c'horn ag an ti ne zistroiomp ket mui da noz hag adtapet omp get ar c'hoant da selaou son an avel a-barzh delioù unan arall get ar c'hoant da sellet doc'h krommennoù skañvoc'h ha diskuishoc'h unan arall hep dont skuizh èl an dud eo ar plantennoù n'int ket gwez ne vevomp ket alies àr hor lerc'h emañ ret hen degemer

emañ ret din mont d'ober ur pok d'ar vugale a-raok bout o lakaet da gousket, evit o diankeniañ a-raok an noz, da gontañ un istorig, ur ganenn pe ur barzhoneg dezhe a-raok an deñvelder

dav e vehe din achuiñ an taolenoù àr ar renk, met re ziwezhat eo ha n'hellan ket livañ hep sklerijenn an deiz, aet eo mouezh toufus an dour-tourmantin a-zoc'h ar stal-livañ ken pell a zo n'em eus ket livet, neoazh livioù a-leizh am eus da zizoleiñ da ergerzhout

mat e vehe din mont d'evañ ur banne en davarn e-tal ma zi, ur werennad muskadit fresk mat pe hini kozh vourbon amerikan, met sur a-walc'h eo aet kuit razh ma mignoned dija

mat e vehe din mont da dreiñ douar ar jardrin, da zouareiñ bokedoù evit kempenn mein-bez ar re a garan, da blanteiñ an avaloù-douar evit an tiad a-bezh, met re zu eo an noz, gwelet e vo 'benn arc'hoazh

mat e vehe din mont d'ar sonadeg rock alternatif a-barzh ar sal o deus savet e penn ar ru, d'ur rave-party a-barzh ur park bras skwatet, met re skuizh on evit pogotiñ pe lammat e-kreiz ur mor a dud

emañ ret din skarzhañ eoul kozh an tangarr, met re deñval eo ar c'harrdi d'an eur-mañ evit labourat aze

frondigoù ar preti e-tal ma zi zo aet a-benn da dreuziñ dre feutadurioù an ti kozh, met sur a-walc'h eo leun d'ar poent, peogwir e klevan c'hoarzh ar merc'hed a zo filennet é treuziñ ar ru

n'em eus ket re a c'hoant, neoazh, dav e vehe din debriñ un tammig, perak pas harenk mogedet get patatez hag ur bern ognon kriz, met un tamm re bonner eo evit ma sac'h-boued bresk

emañ ret din mont da rakprenañ levrioù, skrivet em eus o zitr àr gorn pajenn gentañ kazetenn hiriv

mat e vehe din bout lennet ur levr nemetañ, met penaos gouiet eo an hini mat hep bout graet un asae get razh ar re arall, er riskl da goll anezhañ da virviken

mat e vehe d'am fri kemmeskiñ get ar frondoù penn marc'hadmat àr groc'hen skañv ar merc'hed yaouank

mat e vehe din kaout soñj ag ar wezh diwezhañ on aet get ur plac'h, a bep gwezh em eus flouret merc'hed, a c'hran o c'hrochen edan ma bizioù c'hoantus d'o dizoleiñ

mat e vehe din mont d'ar c'hoariva àr ar vali, met bep pezh-c'hoari zo kroget, moget sigaretenn ar pompour-pad a glevan éc'h uhelaat, sur a-walc'h en deus kuitaet e bost-labour evit merc'heta un eiltudennez edan porched mont a-barzh an aktourion

mat e vehe din mont d'an ti-butun e-tal ma zi, da brenañ ur segalenn vat, met sur a-walc'h eo bet serret ar stal get ar marc'hadour-butun, peogwir ne zivinan ket mui goulioù ruz ar garotezenn tre ar rideozioù

dav e vehe din mont betek an ti-gar, da brenañ un tiked evit mont da weladenniñ re ar familh a zo àr vord ar mor. Mat e vehe din mont d'ar porzh-houarn da vare c'hoari an trenoù, aneleiñ fuel laosket an traktourion-du, neoazh, an holl veajourion zo daet da vout banlevourion, ken abred arall e vez serret an tier-gar bremañ

mat e vehe din selaou ur bladenn, unan gitar klasel, selaou an notennoù lerc'h o lerc'h, selaou bizioù ar sonour é nijal àr seienn ar c'hordennoù

mat e vehe din mont er sine da welet film sioul un oberour ag an orient pe ur film latino en e yezh kentañ, met sur a-walc'h eo kroget an abadenn gentañ

dav e vehe din mont da brenañ bara evit arc'hoazh vintin, met sur a-walc'h emañ ar baraour é kousket dija a-raok labour an noz

emañ ret din mont da vogañ ar loened get bara kalet an ti, mont da gas dour dezhe, met n'eus ket trawalc'h a c'houleier àr an hent betek ar park

mat e vehe din mont da welet un abadenn dañs hip-hop er festival e kreiz-kêr, met kroget eo an arvest peogwir e klevan dañskrennadoù ar gorollerion àr plañchod an ti

emañ ar yenijenn é tont get an deñvelder, eurüsamant, staliet eo bet ma gwele get liñselioù lin gwenn, me a vourra gran al lin edan ma bizioù treuzwelus gosik, get ar blueg ruz tev ne oa ket implijet dibaoe pell on bet goloet gete ivez

mat e vehe din kantreal e kêr, met glav en deus graet ha risklus eo ar riblennoù, bale edan ar boukailh, sellet doc'h an takennoù dour en em verniañ ha sterenniñ àr ma forpant, ur wezh degouezhet e lein ar ru, divinout ar straedoù a zo kuzhet edan bep post lamp

emañ ret din mont d'ober ur pok d'ar vugale a-raok bout o lakaet da gousket, evit o diankeniañ a-raok an noz, da gontañ un istorig, ur ganenn pe ur barzhoneg dezhe a-raok an deñvelder

treuzet eo ar sklerijenn, ker moan eo daet ma divwenn-lagad

razh an dud a oa é kerzhout
ar vugale ar re gozh ar merc'hed ar baotred ar wazed ar maouezi
a-hed aodoù-jibl a-bep seurt strobet ar re get eben disañs
n'hellemp ket gouiet e-men e oa penn ar rankad tud é kerzhout lerc'h o lerc'h
e-men e oa he dibenn
dalc'hmat e veze brav glas ha tomm an amzer
bout e oa familhoù strolladoù mignoned krennarded koubladoù tud amoureux
pep hani a anave unan bennak arall
pep hani a oa é komz-digomz en em floure en em skoazelle
doc'h hañval e oa pep hini é kerzhout get ar memes lusk éc'h arsaviñ gwezhadoù
ne verna peseurt oad pe yec'hed e oant
é kerzhout e oamp-razh davet ar memes tu
é vont àr-raok e oamp-razh
me 'soñje din e oan ar sklerijennour a ya un tamm muioc'h àr-raok evit ar re arall
dalc'hmat
evit reiñ dezhe da c'houiet ar pezh zo é c'hortoz anezhe
met ne oa netra é c'hortoz anezhe
nemet aodoù-jibl arall kouroñkerion arall
a gouske edan gwezennoù e-pad an noz
àr glazennoù troc'het mat evit an degouezh
pep hini a c'hoarzhe ha ne rae forzh a netra
n'hellen bout nemet sklerijennour din ma-unan
peogwir n'em boa darempredoù get den
evit mont àr-raok e rankomp mont a-dreuz fenestroù blokosoù kozh
etre bordoù dir merglet
met biskoazh n'eus unan bennak en em vlesa
d'ar gwashañ e vez tapet ur bos get ur c'hroadur ur wezh an amzer
met unan kozh pe unan gozh a laka sein-c'hwek evit louzouiñ anezhañ
sikouret e vez ar re gozh ivez da dreuziñ ar fenestroù e dibenn pep aod-jibl
àr-dreñv da bep fenestr ez eus un aod-jibl nevez
n'a nepred re bell ar gouroñkerion
biskoazh ne vez ur lestr bennak e disparti an neñv hag an douar
na hent erbet evit mont er-maez ag ar c'hoad
n'eus hani erbet e-touezomp a hañvala chom re bell en ur lec'h pe egile
é kerzhout eh omp-razh

degouezhout a reomp a-barzh tier-gar e penn an noz
a-barzh kêrioù goloet get huiler ha didrouz
a-barzh kêrioù men o deus lazhet razh ar gouleier
peogwir e yeont da gousket kourz

en ur c'hortoz da ziskenn e choma mut pep hini a-barzh an tren n'hor beus mignon erbet
pe hini erbet ag ho familh a zo daet da gerc'hat ac'hanomp peogwir emañ é veajiñ ar bras
anezhe ivez n'eus hini erbet arall àr ar c'haeou nemet lanv ar gêriz a ya hag a za hag un
nebeut re zo bet hor mestrezed daet da gas o merc'h en tren noz

bihan bihan bihan bihan int ken bihan met ken niverus èl bakteriennou mod ar re vunud a
zo bet kavet àr ar loar dek vlezioù zo goude ma oa marv ha douareet da vat an dud o doa
o c'haset a-hont ha ni a zo bihanoc'h a skeul get o berr wel

ha gwad ar re arall da vont ha dont ag hor gwazhi d'egile da gas virusou pe gleñvedou pe
louzoù diabarzh ha gwarez ivez

ar vrud damsonvouget honnezh a faotehe dezhe sonvougiñ da vat gober tevel unangomz
raouiet pistigus ar gêr-vras a denna hec'h anal a c'hwezha he moked a roia ar c'hrign-bev
he bernioù boued re zruz he alkolioù a-leizh evet re he bernioù butum hag he drammoù
enanalet puter blot ar c'hokain a-barzh an toulloù-fri é hilligiñ ar staoñv kaer-bras hor beg
etre un nebeut tapas krazennoù pe sañdouichoù re strafouilhus lonket buan-fonnabl a-
barzh toulloù-lous loñchoù kaborelloù puboù tavarnioù tier-lonk ostalerioù bistroioù
oasisoù hep glazadur men n'eus nemet plantoù butum pe gannab a sava stroñsadennoù
tredan a c'houleier ar straedoù a vaga hor foeñvadurioù hag an holl ac'hanomp get ar
memes huñvre en ur veaj e Skandinavia men e vez ken hir ha ken pell an noz ma ta ken
louet ar c'hroc'hen èl hini bronneged-mor ken gwenn èl an erc'h kentañ ha kourz da vintin
ma zo un dister a vegon genomp c'hoazh e stardomp hor c'hroc'hen c'harv àr gadoerioù-
hir selinet get hu moked get etanol

skuilhet pe zislonket a-hed an noz en em flouromp é tamgousket a vokomp hor beg klouar
hor goùg raouet hor blev skariget betek bout tapet get ar mezvadur ar c'housesked da vat
ha bout drailhet hor mibien-lagad get ar puten-gast a heol dallus

neuze da vintin pa sellan doc'hin dirak ar milouer éc'h adlakaat àr ma daoulagad ha ma
c'horf koerennet ar maskl penn bras a zo bet peget doc'hin dre zegouezh n'en em anavan
ket hag en ur devel em eus keuz ag ar mare pa veze livet e zremm

dall ar valeourion-noz en deiz teñval ha peurbadel ar pezhioù strud a ziv vent spontet rak
ar soñj tevaat din-me e vanka morioù-tud joiaus ha diodad a-barzh leizhadur noz Granada
morioù-tud diskrupuilh àr Ramblas Barcelona morioù-tud liesliv ha mall gete un devezh e
Pariz morioù-tud o zreid gleb un enderviad en Naoned morioù-tud divent gwaskennus
klostro é trapikellat e-pad manifestadegoù re ar sindikatoù d'ar c'hentañ a viz mae er
yenijenn morioù-tud dign ar beoc'helourion morioù-tud puboù lwerzhon an Norzh morioù-
tud skuizh e-bourzh lestroù-treuz Mor Breizh men vez dic'houstet re an douar bras get ar
Vreizhiz-Veur a chaoka silzig ha fritez re gourz da vintin morioù-tud deizioù ar frankizadur
morioù-tud laouen pa vezier an diranted morioù-tud a shoppinga a ludua àr ar balioù
peogwir e vourront ar luduiñ àr ar balioù a gerzha evit kerzhout a dremena hebioù an re

d'egile a filenna a gaoza a-zivout pep tra a-zivout ne vern peseurt tra mont ha dont luskell ar morioù-tud me a vourra ar mor a dud en deus savet ar vaouez kant vlez a oa sebeliet edan ar c'hrenn douar e kavel hor bed a zo bet ur barzhoneg he gerioù kentañ

en ur gêr eh on é chom en ur gêr arall eh on é labourat
daet kêriad un etre daou é fichal

poan an eskern don

n'eo ket abalamour d'ar bouevierezh a-barzh ar prizonioù evit an enebourion bolitik nann n'eo nemet bouevierezh difonn an uzin doc'h an deiz evit paeañ an ti an amprest d'ar bankour hag an aon skontus da goll an disterig ho kwaska uheloc'h evit ar sac'h ar goûg ho kwaska betek kran hoc'h eskern ho trouka kement ha kement goude kement a vlezhadoù loeniñ kiañ rubaniñ labourat gast ha tri mil c'hast da baeañ ar bez mañsonet re domm re yen re sec'h re c'hleb ha dereat gwezh erbet ha blablalabla ha blablalabla ad vitam aeternam

neoazh trawalc'h e vehe mont er-maez ijinañ emañ ar ruioù etre ar parkoù gwez olivez men emañ diwallet doc'h an heol ar re amorous pe ar vugale ha doc'h tachennoù divent tro menezioù-tan Island a dostaomp evit tommañ deomp

gwezhadoù eo tomm-tre deomp ha nag a boan evit kavout an disheol gwezhadoù eo yentre deomp ha nag a boan vreïn evit kavout muioc'h a zilhad gwezhadoù omp gleb-teil agaoz d'ar glav hag e patouilhomp edan hor gwiskamantoù hag hor botoù gleb meur a wezh omp digoefet get an avel hag e tihostomp èl ar loened o deus redet re

bout zo nozioù get barr-avel daoust mard eo distrobet sioul didud digoumoul disheolet an neñv bout zo nozioù get barr-avel daoust ma c'hwezhomp a-barzh an tommder hep avel ma yeomp teir pe bedeur gwezh edan ar strimpadell a-hed an deiz evit skarzhiñ hor blaz korfoù-marv dazont bout zo nozioù get barr-avel daoust mard emañ doareoù ar skinwell pe re ar skingomz é c'hoari divlaz pe divlasoc'h a-benn nepas direnkañ den bout zo nozioù get barr-avel daoust mard emañ razh an dud é kousket sioul ha c'hoant hor beus da lâret dezhe kit da vout kilfouzet razh get ar c'hentañ a dra granek é tont ar gentañ a gorzenn houarn heñvel doc'h kanol ur fuzuilh pe ur revolver

ha maouezi dizent korfoù-marv faslivet o zres a ya a-zoc'h tavarnioù penn grignous chotellioù dioad hag e sellomp doc'hte kemer a reont lec'h hor milouerioù skoachet a-barzh maliadoù hor beajoù dazont edan toenn an neñv e vevomp tra mard emañ-eñ é tiskuzihiñ é chouchoukiñ en tu arall ag an heol en ur vout kravet e skiantoù get an holl steredennoù a zihuna anezhañ tamm ha tamm hag e doull-revr get an holl gaoc'hadoù den en em vernia a-hont a sava ur berniad strouilh tro ar blanedenn a gouezha àrnomp èl ar c'hrañchadoù a dennomp doc'h an amezeg hini an estaj a-us a zo é tehan gouloñ e gibellad freuj àr hor yudadennoù baleourion-noz

pe pep hini a za a-barzh e ziñs men eo bouzar razh an dud men e veva pep hini a-barzh arc'h dasson ur bras a veñveg ne ouia ket mui soniñ muzik peogwir eo bet troc'het daouarn an holl vuzisianed teod an holl ganerion d'un noz krog enne hag int lakaet razh a-hed ur vur hir a vileroù a gilometroù a oa savet gete evit an darvoud-se a-zevri taolioù hir o deus lakaet àr dreketoù an holl vuzisianed zo bet o c'hein doc'h ar vur hag urzh da boziñ o daouarn àr an taolioù dirakte an holl ganerion o deus bet an urzh da izelaat trawalc'h evit poziñ o zeod aze hag ur strollad bouevion touet mat ha tutaet ent-ofisial get ar melestraj a ra ar pezh a vez goulennet gete na mui na ken o deus graet o labour hag

an diouer a vuzisianed a ganerion o doa achapet a-zoc'h ar lazhadeg a gavas gwelloc'h
tevel da viken

ur sekred o deus ar varzhed
ne varvont ket get ar gozhni pe ar c'hleñvedoù
met
pand int skuizh-divi ha kollet o fiziañs
da lakaat perdrerajoù
àr goulioù re lous follezh an dud
e tivizont da gousket da virviken
hep gouiet ma vo trawalc'h evit diskuizhañ